



ANTONIUS Borbonius Dux Vindocinensis inclytus Christ. Franc. Regis in Belgica legatus anno 1542. Turnæam arcem vi expugnatam solo æquavit. Ducem Riviū Atrebatum Gubernatorē fugavit, captis plarīq; arcibus, & castellis intra Atrebatensium fines. Anno mox 1543. Insularium, & Bapalmam quantumlibet valido propugnaretur præsidio, simulq; alia quædam munitissima loca subegit, eaque ad tollendum belli nidum, funditus diruit. Anno hinc 1552. cū intellexisset Dux vigilantissimus supra memoratum Heroa Riviū Imperatoris vices gerentem satagere ne Morinorum ciuitas annonæ, & cibariorum comætu instrueretur, comparata ad hoc impediendum numerosa Flandrorum Belgarum expeditione, illi mox occurrit: vbi cæsis quàm plurimis, nonnullisq; captiuis: eodem momento Castellum Comitum vi cœpit. maximum obstaculum hostibus futurum. Regisq; imperio id ipsum subdidit. Sequenti mense Decembris Hedino per Legatum Riviū expugnato, repentè fortissimus Heros tanto impetu, ac ardore adcurrit: vt intra breue temporis spatium in pristinum statū restituerit. Deniq; inuictus hic, & inclytus Princeps egregios conatus suos tantis animis, prudentia, & strenuitate persequitur adhuc nobis superstes: vt immensæ sublimitatis maiorem in dies spem ostendat.

IOANNA d'Albret Regis Navarrae, & clarissimæ Principis illius Margaretae Regiæ sororis filia vnica, Moliniis incredibili nobilium & popularium applausu nupsit suprascripto illustrissimo Duci Vindocinensi. Porrò ea nulla ex parte à tantis, talibusque parentibus degenerat: quin protinus æmulatur moribus, ac virtutibus planè Regiis, & summo amore literarum, ac virtutum, quibus ipsa etiam est ornatissima.